

明史稿



明史藁

列傳第一百二十九

光祿大夫 經筵講官明史總裁戶部尚書加七級臣王鴻緒奉

敕編撰

賀世賢

尤世功

童仲揆

陳策

張神武

周敦吉

羅一貫

劉渠 祁秉忠

滿桂

孫祖壽

趙率教

朱國彥

官惟賢

何可綱

黃龍

金日觀

金國鳳

楊振 楊國柱

曹變蛟

李輔明

賀世賢榆林衛人幼爲廝養後從軍積功至瀋陽游擊遷義州參將萬曆四十六年清河被圍副將鄒儲賢固守發大砲木石頗傷攻者無何城破率親丁鏖戰城南與參將張旆俱死部將人斃民萬餘殲焉世賢駐驍陽聞變疾馳出塞

得首功百五十餘級進副總兵明年楊鎬四路出師世賢副
李如柏出清河劉綎圍急勸如柏往救不從綎遂覆沒尋擢
都督僉事充總兵官駐虎皮驛鐵嶺被圍世賢馳援城已破
邀獲首功百餘級泰昌元年九月連戰灰山撫安堡獲首功
二百有奇當是時四方宿將鱗集遼左率縮朒不敢戰或託
疾謝去獨世賢數角鬪有功同列者多忌之及世賢移鎮瀋
陽經略袁應泰下納降令世賢所納多總兵官李光榮疑之
以狀聞給事御史蕭基王業浩等爭言不可遼東巡撫薛國
用亦奏三可慮兵部尚書崔景榮請拒勿納而置已納者於
他方然世賢所納者卒不可散同列遂謗其有異志天啓元
年三月

大清以重兵薄藩陽世賢及總兵官尤世功掘塹濬濠樹大木爲柵列楯車火器木石環城設兵守城法甚具

大清先以數十騎來偵世功兵躡之殺四人世賢勇而輕素嗜酒旦日食酒率親丁出城逆擊

大清兵佯敗世賢乘銳進倏精騎四合世賢戰且却抵西門

身中十四矢城中聞世賢敗各鳥獸竄而降丁復叛斷城外

弔橋或勸世賢走遼陽曰吾爲大將不能存城何面目見袁

經略乎已而圍急世賢揮鐵鞭決鬪殺數人中矢墜馬死世

功引兵援亦戰死世功亦榆林人萬曆中舉武鄉試累官藩

陽游擊張承慶之敗也世功脫歸坐禡職經略楊鎬言其身

負重傷不堪策勵乃補武精營游擊鎬四路出師世功隸李

如柏麾丁得全奪副總兵守瀋陽熊廷弼代鎬愛其才與
朱萬良並倚任廷弼罷袁應泰代議三路出師用爲總兵官
未行而瀋陽被兵遂戰死贈少保左都督增世廕三級再廕
指揮僉事世襲賜祭葬建祠曰愍忠世賢旣歿衆謂其叛降
恤典不及四川副使車樸爲訟冤格衆議不果

童仲揆南京人舉武會試歷官都指揮掌四川都司萬曆末
遼東告警擢副總兵督川兵赴援與同官陳策並克援勦總
兵官經略袁應泰招蒙古數萬人裨揆力諫不聽天啓元年
正月應泰欲城清河撫順議三路出師用大將十人各將兵
萬策仲揆當其二未行我
大清兵已逼瀋陽兩人馳救次渾河聞賀世賢尤世功戰歿

欲旋師游擊周敦吉固請石砭都司秦邦屏先渡河營橋
副將戚金參將張名世統浙兵三千與策仲揆等營橋南邦
屏壘未就

大清兵力攻却復前者三諸軍遂敗敦吉邦屏及參將吳文
傑守備雷安民等皆死他將走入浙兵營被圍數重副將朱
萬良姜弼不救及圍急始前每戰輒敗
大清兵乃盡萃於浙營營中用火器多殺傷已火藥盡短兵
接遂大潰策先戰死仲揆將奔金止之曰公何往請返鬪語
其屬曰吾二人得死所矣遂還兵決戰力盡矢竭揮刃殺十
七人

大清兵萬矢齊發仲揆與金名世及都司袁見龍鄧起龍等

並死焉萬良旣遁經略將斬之乞貰罪自効及遼陽被攻果陷陣死自遼左用兵將士率望風奔潰獨此以萬餘人當數萬衆雖力屈而覆時咸壯之事聞贈策少保左都督增世廕三級再廕本衛指揮僉事世襲賜祭葬建祠曰愍忠仲揆贈都督同知增世廕三級建祠金起龍贈都督僉事亦增世廕三級附祀名世先有罪繫獄尚書薛三才薦其善火器命從征立功文傑亦先褫職及死並得復官贈三級增世廕二級見龍等贈廕有差又有楊宗業梁仲善者皆援遼總兵官宗業歷鎮浙江山西楊鎬四路敗後命提兵赴援至是父子並戰死仲善亦戰死遼陽城下宗業贈都督同知世廕千戶仲善贈都督僉事增世廕三級並從祠附祀他副將以下至把

總戰死者百二十餘人皆予贈廕
張神武新建人萬曆中舉武會試第一授四川都司僉書永
寧宣撫奢效忠卒子崇明幼其妻奢世統與妾奢世續爭印
相攻者十餘年後崇明襲職世續猶匿印不予神武與永寧
參將周敦吉謀盡掠其積聚子女擒世續以歸其部目閻宗
傳怒以求主母爲名大掠永寧赤水普市摩泥數百里無人
迹事聞神武敦吉並論死遼左兵興用經略袁應泰薦命從
征神武率親丁二百四十餘疾馳至廣寧遼陽已失巡撫薛
國用留之不可曰奉命援遼陽非守廣寧也曰遼陽沒矣若
何之曰將以殲敵曰二百人能殲敵乎曰不能則死之前至
河遇逃卒十餘萬神武激其帥曰以此衆戰孰禦且雖死不

失忠義乃鼠竄偷生乎帥不從神武遂獨率所部以進渡河抵首山去遼陽十七里而軍將士不食已一日遇

大清兵奮呼擊殺孤軍無援遂歿於陣所部俱戰死無降者存十四人負重傷還監軍御史方震孺繪神武像率將士羅拜爲文祭之詔贈都督僉事立祠奉祀世廕千戶敦吉旣論死亦從軍自效援瀋陽次渾河諸將不欲進敦吉曰事急矣請直抵瀋陽與城中兵夾擊未至而瀋陽破諸將皆憤曰我輩不能禦敵在此三載何爲遂與秦邦屏等渡河鏖戰皆死贈恤如制

羅一貫甘州衛人歷官遼東參將守西平堡遼陽覆沒西平當衝地一貫曉夜捍禦天啓元年巡撫王化貞言於朝加副

總兵初定議化貞駐廣寧經略熊廷弼駐右屯總兵劉渠以二萬人守鎮武祁秉忠以萬人守閭陽而一貫以三千人守西平各堅壁急則互相援明年正月十有九日大清兵西渡河渠化貞戒毋輕戰及兵漸近參將黑雲鶴出擊一貫止之不從明日雲鶴戰敗奔還城爲追兵所殲一貫憑城固拒用砲傷攻者

大清樹旂招降且遣使來說一貫不從又明日騎益衆環城力攻一貫目中矢不能戰矢石火藥盡乃北向再拜曰臣力盡矣遂自剄都司陳尚仁王崇信亦死焉廷弼化貞初擁兵不救已知城未下化貞信游擊孫得功言盡發廣寧兵付得功及中軍游擊祖大壽令會秉忠赴援廷弼亦遣使督渠進

戰諸軍遇

大清兵於平陽以得功大壽爲前鋒得功懷異志欲引去乃分兵爲左右翼稍却推渠秉忠前渠等力戰頗有殺傷得功及副將鮑承先等走後軍見之亦走遂大潰渠戰死秉忠被二刀三矢家衆扶上馬奪重圍出創重卒於途副將劉徵擊殺十餘人乃死大壽走覺華島得功遂降越二日廣寧卽破事聞贈一貫都督同知世廕副千戶渠秉忠少保左都督增世廕三級再廕指揮僉事皆賜祭葬建祠並祀一貫子俊傑承廕崇禎中仕至宣府總兵官免歸李自成陷甘州俊傑死焉渠京城巡捕營副將也以御史楊鶴薦擢總兵官援剿遼東遼陽被圍廣寧總兵官李光榮不救反斷河橋截軍民歸

路爲總督文球劾罷卽以渠代西平告急渠盡撤鎮武兵赴之遂戰歿秉忠陝西人萬曆四十四年爲永昌參將銀定歹成以二千餘騎入塞秉忠提兵三百拒之轉戰兩晝夜援軍至寇敗去追還被掠人畜邊人稱之尋擢涼州副總兵經略袁應泰薦其智勇令率私卒守蒲河至則遼陽已被命爲援勦總兵官守閭陽驛竟死自遼左軍興總兵官戰歿者十有四人撫順則張承廕四路出師則劉綎杜松王宣趙夢麟開原則馬林潘陽則賀世賢尤世功渾河則陳策童仲揆遼陽則楊宗業梁仲善至是渠秉忠繼之恤典皆厚而饋軍之將若李如栢李秉誠麻承恩輩竟未膺顯戮云

滿桂蒙古人幼入中國家宣府稍長勇敢便騎射每從征多

斬馘軍令獲敵首一予一官否則賚白金五十桂屢獲金不受職年及壯始爲總旂會塞上無警居十餘年乃得一級爲百戶後屢遷潮河川守備楊鎬四路師敗薦小將知兵者數人首及桂命移守黃土嶺爲總督王象乾所知歷石塘路游擊喜峯口參將天啓二年大學士孫承宗行邊桂入謁承宗壯其貌與語兵事大奇之及出鎮山海卽擢副總兵領中軍事承宗幕下文武輻輳獨用桂桂椎魯甚衆皆竊笑之然忠勇絕倫持身廉無聲色好與士卒同甘苦明年承宗議出關修復寧遠問誰可守者馬世龍以孫諫對承宗不可薦李承先亦不可袁崇煥茅元儀進曰滿桂可但爲公中軍不敢請耳承宗曰可安問中軍呼桂語之慨然請行世龍猶以爲不

可承宗不聽卽置酒餞之桂至寧遠與崇煥協心經度屹然
成重鎮語具崇煥傳時蒙古部落多駐牧寧遠東鄙遼民來
歸者悉爲所掠承宗欲勦之四年二月遣桂及總兵尤世祿
襲之大凌河諸部號泣西竄東鄙以寧拱免宰賽炒花諸部
陽受款而陰反側桂善操縱諸部咸服歲省撫賞費不貲初
城內外人跡蕭然至是軍民五萬餘家屯種至五十里遠近
莫不歸附其年九月承宗顯暴其功請進秩褒賞詔擢都督
僉事加銜總兵承宗乃令典後部與前部趙率教相犄角與
蒙古戰乾糧坵斬獲多督餉郎中楊呈秀尅餉副將徐漣激
軍變圍崇煥署欲犯桂憚其家卒衆不敢乃東走桂與崇煥
追斬首惡撫餘衆而還六年正月我

大清以數萬騎來攻遠近大震桂與崇煥死守發大砲傷攻者圍解帝大喜立擢都督同知實授總兵官時

大清分兵攻覺華島盡焚其積貯圍旣解桂急率兵往救已無及論功再加右都督廕世襲副千戶桂疏謝復自刎前後功優詔褒答再進左都督桂初與趙率教善每事推之是役也怒率教不親救相責望中朝聞之下勅戒諭至五月崇煥復言桂非但惡率教與臣及將卒皆不和自解圍後意氣彌張驕蹇謾罵恐壞封疆大計乞移之別鎮以關外事權歸率教舉朝皆知桂可用而慮其同城敗事遂召還京方崇煥之發疏也督師王之臣不與聞比聞馳至寧遠勸止之崇煥亦遣使追桂而召命已下之臣力言桂不可去請用之關門崇

煥又以爲不可閏六月乃命以故秩僉書中軍府事未幾崇煥亦自悔請仍用之臣言帝可之命桂掛印移鎮關門兼統關外四路及燕河建昌諸軍賜尚方劍七月五月

大清兵圍錦州分兵擊寧遠桂急遣兵往救被圍箠籬山桂與總兵尤世祿赴之大戰相當遂入寧遠城與崇煥爲守禦計俄

大清兵進薄城下桂率副將尤世威等出城迎頗有殺傷桂親冒矢石身亦被創遂以却敵功加太子太師世廕錦衣僉事及崇煥去王之臣再出督師盛推桂才請仍鎮寧遠會蒙古炒花諸部離散桂與之臣多收之麾下中朝聞而非之莊烈帝已嗣位詔之臣毋蹈袁應泰王化貞故轍并責桂阿之

臣意桂遂請病乞休帝慰留之已而言官劾之臣多及桂之臣竟罷桂亦召還府崇禎元年七月也適大同總兵渠家楨失事以桂代之大同久恃欵弛備插部西侵順義王遂入境大掠家楨及巡撫張翼明論死插部遂挾賞不去桂至遍歷八路七十二城堡大修守備軍民恃以無恐明年正月

大清兵入近畿桂立師五千騎入衛次順義與宣府總兵侯世祿俱戰敗遂趨都城帝聞遣官慰勞犒萬金令與世祿俱屯德勝門無何交戰世祿兵潰桂獨前鬪城上發大砲佐之悞傷桂軍甚衆桂亦負傷帝遣中官勞以羊酒令入休甕城旋與袁崇煥祖大壽並召見桂解衣示創帝深嘉歎拜賜而出十二月朔復召見下崇煥獄賜桂酒饌令總理關寧諸軍